

आकाशवाणी जयपुर-अजमेर

प्रादेशिक समाचार

दिनांक 13.02.2025

समय: 18.45 बजे

- आयकर विधेयक 2025 आज लोकसभा मांय पेश करी ज्यो— संयुक्त संसदीय समिति री वक्फ संशोधन बिल ऊं जुड़ी रपट ई पेश करी ज्यी।
- प्रधानमंत्री नरेन्द्र मोदी रो आज अमरीका रा राष्ट्रपति डोनाल्ड ट्रम्प सागे मुलाकात रो कार्यक्रम—दोन्यू देशां बीचे केई मुद्दां माथे करार रा आसार।
- मुख्यमंत्री भजनलाल शर्मा कह्यो —प्रदेश री माली व्यवस्था ने दुगुणी करण सारू सरकार प्रतिबद्ध।
- विश्व रेडियो दिवस रे मौके आज केई कार्यक्रम राख्यी ज्या—प्रधानमंत्री शुभकामनावां दीनी।

000

आयकर बिल 2025 आज लोकसभा मांय पेश करी ज्यो। वित्त मंत्री निर्मला सीतारमण लोकसभा मांय ओ बिल पेश करता थकां कह्यो के बिल मांय मौजूदा आयकर कानून री तुलना मांय धारावां अर अध्यायां री तादाद कम कर र इण ने आसान बणावण रो प्रस्ताव करी ज्यो है। वित्त मंत्री बिल ने जांच सारू संसद री प्रवर समिति कने भेजण री राय दीनी।

000

वक्फ संशोधन बिल 2024 ऊं जुड़ी संयुक्त संसदीय समिति री रपट आज विपक्ष रा विरोध बीचे संसद रा दोन्यू सदनां मांय पेश करी ज्यी। लोकसभा मांय समिति रा अध्यक्ष जगदम्बिका पाल अर राज्यसभा मांय भारतीय जनता पार्टी री सांसद डॉ. मेधा विश्राम कुलकर्णी रपट री प्रति सदन मांय पेश कीनी। संसदीय कार्य मंत्री किरन रिजिजू साफ कीनो के रपट, कार्यवाही अर असहमति नोट रो कोई ई हिस्सा नी हटायी ज्यो है। वे विपक्ष माथे ई मुद्दा ने ले र सदन ने गुमराह करण रो आरोप मांड्यो।

000

प्रधानमंत्री नरेन्द्र मोदी रो आज अमरीका रा राष्ट्रपति डोनाल्ड ट्रम्प सागे मुलाकात रो कार्यक्रम है। ई दौरान द्विपक्षीय अर प्रतिनिधिमंडल स्तर री बातचीत व्हेला। श्री मोदी रो अमरीका रा आला नेतावां, मोटा कारोबारियां अर भारतीय समुदाय रा लोगां सागे बातचीत रो ई कार्यक्रम है। फ्रांस रा दौरा पाछे श्री मोदी दो दिन री यात्रा सारू वाशिंगटन पूग्या। वे अमरीका रा राष्ट्रीय खुफिया विभाग री निदेशक तुलसी गबार्ड सागे मुलाकात कीनी। ई दौरान दोन्यू बीचे द्विपक्षीय खुफिया सहयोग बधावण, आतंकवाद विरोधी रणनीति, साइबर सुरक्षा अर रणनीतिक खुफिया जानकारी एक-दूजा ने देवण रा बारा मांय चर्चा व्ही।

000

मुख्यमंत्री भजनलाल शर्मा कह्यो है के राज्य सरकार प्रदेश री माली व्यवस्था ने दुगुणी करण री सोच सागे काम कर रही है। वे आज जयपुर मांय राख्यी ज्या एक कार्यक्रम मांय बोल रह्या हा। श्री शर्मा कह्यो के राज्य मांय निवेश बधावण सारू सरकारी अर गैर-सरकारी कम्पनियां री ओर ऊं निवेश कर्यो जा रह्यो है।

मुख्यमंत्री कह्यो के राज्य सरकार कारोबार करण ने आसाण बणावण री सोच सागे न्यारी- न्यारी नीतियां रे ज़रिए औद्योगिक विकास सारू काम कर रही है।

मुख्यमंत्री कह्यो के राज्य री मौजूदा सरकार वां रा पहला बजट मांय ही पूंजीगत खर्च मांय 65 फीसदी ऊं बत्ती री बधोतरी कीनी है। वे निवेशकां ऊं राज्य मांय बत्तो ऊं बत्तो निवेश करण री अपील कीनी।

000

आज विश्व रेडियो दिवस है। लोगों मांय रेडियो रा महत्त्व रा बारा मांय जाग जगावण अर रेडियो रे जरिये जाणकारियां हासिल करण ने बधावो देवण सारु हर साल 13 फरवरी ने विश्व रेडियो दिवस मनायो जावे है। पेश है।

प्रधानमंत्री नरेन्द्र मोदी आज विश्व रेडियो दिवस रे मौके सोशल मीडिया पोस्ट रे जरिये कह्यो के रेडियो केई लोगों री जीवनरेखा रह्यो है। वे कह्यो के समाचार अर संस्कृति ऊं ले र संगीत अर कहानी कहवण ताई रो ओ ताकतवर जरियो है। श्री मोदी लोगों ऊं हा महीना प्रसारित कर्या जावण वाळा खास कार्यक्रम मन की बात सारु विचार अर सुझाव देवण बाबत् कह्यो। सूचना अर प्रसारण मंत्रालय री ओर ऊं आज नई दिल्ली मांय रेडियो महोत्सव-2025 री सरुआत करीजी।

ई मौके मंत्रालय रा सचिव संजय जाजू कह्यो के रेडियो लोगों ने जोड़े है अर देशां अर समुदायां बीचे रिश्ता मजबूत करण मांय खास भूमिका निभावे है। ई मौके आकाशवाणी री महानिदेशक डॉ. प्रज्ञा पालीवाल गौड़ कह्यो के लोगों ने आकाशवाणी रा कार्यक्रमां री सामग्री अर समाचारां माथे भरोसो है।

000

अर अब खबरां महाकुम्भ री –

प्रयागराज मांय चाल रह्या महाकुंभ रे दौरान जातरुआं ने अफवाहां अर गलत जाणकारियां ऊं बचावण सारु उत्तर प्रदेश पुलिस री ओर ऊं करडी कार्रवाई करी जा रही है। उत्तर प्रदेश रा पुलिस महानिदेशक प्रशांत कुमार बतायो के सोशल मीडिया माथे ऐंडा अकाउंट्स री पिछाण कर र कार्रवाई करी जा रही है जो महाकुंभ रा बारा मांय फर्जी खबरां फैला रह्या है। वे जनता ऊं भरमावण वाळी जाणकारियां अर फर्जी खबरां ऊं दूर रेहवण री अपील कीनी।

000

सवाईमाधोपुर जिला मांय रणथंभौर टाइगर रिजर्व पाछे अब पालीघाट रो चंबल घड़ियाल सेंक्चुरी ई सैर-सपाटा री नुवी ठोड़ रा तौर ऊं विकसित व्हे रह्यो है। वठे रोजीना मोटी तादाद मांय देशी-परदेशी सैलानियां अर जिनावरां रा प्रेमी लोगों रे पूगण ऊं वठे रा लोगों ने काम-धंधा रा बेहतर मौका ई मिलण लाग्या है।

000

बांसवाड़ा रा रीको औद्योगिक हलका मांय पटाखा बणावण रा एक कारखाना मांय आज लाय लाग जावण रे कारण तीस ऊं बत्ता लोग झुलस ग्या। पुलिस रे मुजब कारखाना मांय काम रे दौरान तेज धमाका सागे लाय लाग ग्यी। इण रे फेंट मांय आवण ऊं केई बच्चा ई झुलस ग्या। जाणकारी मिल्या पाछे मौके पूगी दमकल गाड़ियां लाय माथे काबू कीनो।

000

विश्वविद्यालय अनुदान आयोग-यूजीसी झुंझुनू री जगदीश प्रसाद झाबरमल टिबड़ेवाल यूनिवर्सिटी रा पीएचडी कोर्स माथे पांच साल ताई रोक लगा दीनी है। यूजीसी विश्वविद्यालय रा प्रबंधन ने शोध करण वाळां रा नामांकन तुरत बंद करण बाबत् कह्यो है। ई विश्वविद्यालय रा पीएचडी कोर्स रा बारा मांय लगातार मिल रही शिकायतां पाछे यूजीसी रा सचिव मनीष जोशी री ओर ऊं हुकम जारी करी ज्या है।

दूजी कानी विश्वविद्यालय रा कुलपति डॉ. देवेन्द्र सिंह ढूल कह्यो के विश्वविद्यालय प्रशासन ई बारा मांय यूजीसी सामी वां री बात रखेला।

000

प्रदेश री कृषि उपज मण्डी समितियां मांय सुबीता बधावण सारु 24 करोड़ रुपया मंजूर करी ज्या है। ई रा तैत लालसोट, भवानीमण्डी, देवली अर कोटपूतली कृषि उपज मंडियां मांय 7 करोड़ 27 लाख रुपया रा खर्च ऊं बुनियादी ढांचो विकसित कर्यो जावेला। लूणकरणसर, श्रीकरणपुर, बीकानेर, पूगल रोड, खाजूवाला, श्रीमाधोपुर, नोखा, श्रीडूंगरगढ़ अर पदमपुर री मंडियां मांय सम्पर्क सड़कां बणावण रा काम माथे ई 16 करोड़ 73 लाख रुपया खर्च कर्या जावेला।

000

चिकित्सा मंत्री गजेंद्र सिंह खींवर आज जोधपुर रा खास-खास अस्पतालां रो दौरा कर र व्यवस्थावां रो जायजो लीनो। वे मथुरादास माथुर अस्पताल अर महात्मा गांधी अस्पताल रो दौरा कर र मरीजां सागे बातचीत कीनी। श्री खींवर आं अस्पतालां रा अधीक्षकां ने ईलाज रा सुबीता बेहतर राखण अर मरीजां रा ईलाज रा सगळा माकूल इंतजामात तैय करण रा हुकम दीना। चिकित्सा मंत्री अस्पताल मांय फूड कोर्ट सरु करण अर साफ-सफाई रो खास ध्यान राखण बाबत ई कह्यो।

000

झुंझुनूं जिला रा 40 प्रगतिशील किसानां रो एक दल आज मेरठ सारु रवाना व्ह्यो। आं किसानां ने सरदार पटेल कृषि विश्वविद्यालय मांय सात दिन तांई उन्नत तरीका खेती-बाड़ी करण री सिखावण दी जावेला। यात्रा रे दौरान अ किसान मेरठ रा प्रगतिशील किसानां सागे ई बातचीत करेला।

ई बीचे पीएम कुसुम योजना रा तैत किसानां ने साढे सात हॉर्स पावर बूता तांई रा सौर ऊर्जा संयंत्र देवण सारु कृषि विभाग आर्जियां मांगी है। बीकानेर रा उद्यान विभाग रा कृषि अहलकार मुकेश गहलोत बतायो के योजना रा तैत सब्सिडी सारु किसान **राज किसान साथी पोर्टल** माथे ज़रूरी कागजात सागे ऑनलाईन तरीका ऊं अर्जी दे सके है।

000